

تورک یوردی

ناشری : تورک یوردی .

مدیری : آق چوره اوغلی یوسف .

صافی ۱۹

۲۶ نومبر ۱۳۳۸

یل ۱

«کیمک که طاغده باغی وار . یورکنده داغی وار .»

داغ ۱

طاغده کی باغ ، بودنیادن جیقوب کیتدیکم وقت ، یرمه براقاجم اوغلمدر ،
یوره کده کی داغ ده اونی آدم ایدوب آدم آراسنه قاتمق قایغیسیدر .

اومارم که شور سوزله بوتون چوجوق بابالری ، بابالق موقعنده اولانلری
اویقودن اویاندیریرکی اویاندیردم . البته ، یوره کنده داغی اولانلرک طویغوسی
زیاده اولور . اونلر کندی دردلری دیکه مش اولق ایچون بی دیکه سینلر .
کاسینلر ، برابر ایکله یلم ، برابر آغلا یلم ، برابر یانوب یاقیلا یلم .

بوتون بابالر، کندینده بابا طویغوسی اولانلر آکلارکه اللهک شوقارا طوبراق
اوستنده انسانه ویردیکی نعمتلك ، سعادتلك اك بویوکی بابا اولق ، اوغانی قیزی
طاوغدیقلری طویدیقلری طوبراغه یارار حالده یتیشدیرمکدر . بوکا کیمسه نك
دییه جکی یوق ، فقط بو نعمت ، بو سعادت بزم مملکتده نه درجه یه قادار میسر
اولویور ؟

داغ ۲

بزم کچی ، اورتا حالده ویا اورتا حاله یاقین موقعده بولونانلر، البته مخصوص
مرییلر و معلملر طونارق جوجوقلری اولرنده اوقوتوب یتیشدیره منزلر . اونلر
ایچون بونلری البته مکتب دنیلن یرلر یوللامق چاره سزدر . بو چاره سزلك ،
بوندن یدی بیل اول ، اوغلم یدی یاشنه کادیکی وقت بنم ده اوکه چیقدی .
مکتبلر حقنده او زمان بوکونکی قادار فنا نظرم یوق . فقط دائما یوره کدن بر
اوریرمه طویورم ، قورقورم .

نه قادار قورقارسم قورقایم ، چاره یوق که . بن ده مرکس کچی بریر آرادم .
اوتوردیغمز یره یاقین دوشن یشیل طولومباده (رهنمای فیوضات) آدلی مکتبه

کیتدم . چوجوقله برابر اورایه ایجه زمان کیروب جیقدم . استانبولده بلکه ده بوتون شهرلر مزده مکتبک و مکتبجیلکک نه دیمک اولدیغی ، کیتدکجه یوره کم دها جیز جیز یانارق ، الاول اوراده آکلادم . اوراده کوردیکم ، اوراده آکلادیغ شیلر خیلی اوزوندیر . اولری شمکیلک کجهیم .

کچن دورده ، ایچدن ایجه جوروین شیلر بر آز دها جوق زمان اورتاده طور ایلیرکن ، انقلابدن سوکره بو حال دگیشدی . بوسیرده بو آدی کوزل مکتب ده ایچنه کیریه من حاله دوشوب قاپاندی ، یوق اولدی .

داغ ۳

چوجوغه مکتب لازم .. بر جوق ، اسملری معرفتی ، عرفانی ، ترقیلی ، شکرانی مکتبلر وار . فقط هانکیسنک قاییدنی چالما؟ هانکیسنه باش اورمالی؟ او مکتبلرکه چوغنک قاییدسنده دیوارنده آصیلی لوحه لرده بالفرض (کلزار حمیدی) کچی عنوانلرده (حمیدی) علاوه سی یالاب یالاب یانیور . کویا که پارلاق برر بیلدیزکی پارلایان بو علاوه لک بر کون [۱] سرعتله مهارتله سیلینبوره جکنی بکا بریسی خبر و بریور . نه یایمالی ؟

مکتبلرک ایچ یوزنی دها ائی بیلنلردن بر آرقاداشم [۲] ، رسمیلر خصوصیلردن حالیه ده ، داوود باشا مکتبنه کیده لم ، دیدی . اوبله یابدیق . چوجوق ایکی بیل ده اوراده قالدی ، رشدی تحصیلی بیتیدی . نه دییهیم ، بو مکتب ده باشقه لری کیدر . کچن دورده « سایه معارفویه حضرت پادشاهیده .. » کچی یایمه شیلره اویالانه بیلوردیق . بو دورده اوده یوق .. حقیقت ، جیریل چیپلاق اورتاده .

بو مکتبک اعدادی قسمی ده وار . فقط ، اعدادی تحصیلی ایچون نه یایاجم ، دییه نیم ایچمی قوردلر بیور .

[۱] فی الحقیقه کونی کلدیکنده [۱۴ نیسان سنه ۳۲۸ ، خلع کونی] بویه اولدی .

[۲] زراعت بانقه سنده عارف حکمت .

نه یاباجغم؟ وفا و مرجان اعدادیلرندن بری .. خصوصی مکتبلردن بری ..
خاییر خاییر ، طیشلاریدن یشیل تر به کورون بو مکتبلرک هیدسی ایچون
استغفرالله توبه !.. سلطان، اولمازسه استانبول سلطانیسی .. فره درلر مکتبلری ،
قاضی کوی ، قوم قانی .. سن به نوا .. آلمان مکتبی .. انکلیر مکتبی ، روبه رت
قولله ج

داغ ۴

بونلری بویله دوش-ونیورم . اوچیورم ، اوچیورم قونامایورم . کوکلم
بولانیور ، کوزم نمله نیور . دییه بیلیرم که ایچمده برشی جییر جییر اوفانوب
خون اولیور . نه یاباجغم ، اللهم ، نه یاباجغم؟ نه یاباجق ایسه هان یایمالی یم ..
وقت یوق .

اوبرلری طورسون .. ینه اسکی سلطانی سلطانیدر ، دیورم .. خیر خواه
آرقاداشلرده بویله دیور . سلطانیکنک سنه لک اجر قی نه؟ البته بونی دوشونمک ،
حسابه آلق اک اهمیتلی ایش .. دیشدن طیر ناقدن آرتیرا بیله حکم شیله بونی قاپاته
بیله جکمی یم؟ قرق بش ایرا ، البسه قارشیلانی ، کتاب قارشیلانی فلان ینه باشقه .
نه یایمالی؟ نه یایمالی ، دییه دوشوندی کهجه کوشه رکبی اولیورم . طور باقلم ،
دیورم .

دیرکن سلطانی اعلان ایدیور : مکتبک لیلی نهاری بوتون صنفلری تمامیه
طولو اولدیغدن بو سنه یکیدن طایه آلینامایه جق .. نافنه مکتبه مراجعتله
کیسه لر اوزولمه سین . یا؟ اوت ، اوزولمه ده محل یوق ، مکتبی تعجیز ایتمه ده .

داغ ۵

نه یاباجقز؟ بونی کندیعدن بوشنه سور یورم . آرقاداشلردن ایکیسی [۱]
طارالدیغمی کوریور .. بو جمعه سنکله حصاره کیده لم ، دیورلر . اوغلمی ده
برابر آلارق کیدیورز . الهی نه عظمتلی قایالق؟ نه عظمتلی طاغ؟ بنسا ،

[۱] اعدادی معلملرندن ، اسماعیل منیر و سامی .

منظره ، هرشی کوز قاماشدیریور .. استانبولک باشی اوستنده بر آمریقان قولونیسسی .. طلبه تمیز ، چویک ، چالاک .. معلم اولری قیرمیزی ، سومیلی .. معلملر دایما اوراده ، دایما طلبه ایله برابر .. اوخ نه اعلا یر ؟ کوزی قاپایوب طالبورز .. کیرمک ایچون نه شرط لازم ؟ اجرتی نه قادار ؟ آلتش لیرا .. شویله اولورسه شوقادار داها .. بویله اولورسه بوقادار داها ، المنزه برده بروغرام ویریورلر .

دونیورز . واپورده ایکی آرقاداشم شن ، شاطر .. اوغلم هوسلی ، خولیا کار .. فقط زواللی بابا طالفین ، پریشان .. نلر دوشونیورم ؟ واپورک دیننده اویناشان طالفالردن نه معنارچیقاریورم ؟ آرقاداشلرک ، قرار ویرلدی ، دیمه لرینه مقابل ، فضله تبسملری طونارطوریه دوداقلری ایصیریرکی یاییورم . بروغرامده باش دوندورن پارا حکایه لرندن قاچه قاچه طولاشیورم .. (علوم دینی) سرنامه لی یرم کلیورم : ... طلبه قولله جک نظامنامه اساسی موجبنجه صباحلری دعاده وپازار کونلری مکتبده اولانلر صباح و آقشام آیینده حاضر بولونورلر . خرسستیانلغک تاریخ تکاملی ایله کتاب مقدس تدریساتی عموم بروغرامده داخلدر ... »

بو طوراقده طوریورم . چونکه یالکمز پارا اوزرینه سویله مک یی آرقاداشلره قارشى بر آرز صیقیور . بونکله ای بر بهانه بولمش اولیورم .

داغ ۶

کلیورز ، اوکیجه اویقویوق . کندی کندیمه ضوریورم .. غلطه سلطانیسی قاپالی .. عجیبا استانبول سلطانیسی نه وقت آجیلاجق ؟ یانی وار .. البته اعلان ایدم جککلر . جمعه ایرتسی کونی احتیاطآینه مکتب سواقاغندن برکییورم .. مکتبه حسرتله باقیورم . نه اولور ؟ ایچیری یه کپروب بر داها سورایم . آکلیورم ، بکله ، دییه جککلر . اعلانه قادار بکله مهلی ، ممجزلک ایتمه مهلی . بن بویله حسابلرله قورونتولرله ایرکیلوب طوریورم . اعلانی بکله یورم .

دیرکن کونک برنده بوراسی ده ، او بر قارداشی کبی ، اعلان ایدیور .. استانبول سلطانیسنک طلبه قیدی معامله سی بیتدی ، دفتری قاپاندی .

آمان مدیر افندی ، برچاره ؟ قابل دکل ، نه یاپالم طولو ؟ بوصیره ده خضر کبی ، بحرکلی برذات بکا آجیور ، مدیره صوقولیور .. قید اولونانلردن شاید کلین اولورسه .. بونی اوسورتله آچیلاجق بره آلیکیز ، غنایت ایدیکز ، دیور . باقالم دیوب یازیورلر . فقط باشقه کلنلری رد ایتدیکارینی ده بو ذات کوریور ، بکا حکایه ایدیور ...

داغ ۷

آم احتیاطسزلق ، آم صیقیلغانلق ! نهیه بو مکتبک قایسی زورلایه رق رمضانده فلان کیدوب قید ایچون چالیشمادم ؟ اما یانی وار ایدی . بیتدیکنده البته اعلان ایدیه جک ایدی . بوکا نهیه اینانیرسک ؟ سرسملک ایدرسک ؟ نفسمله بویله چکی شیرکن ذهنمده یکی بر شیمشک جا قار .. امان ، دیمیا طه پیرنجی کیدرکن اوده کی بولغوردن اولمایلم ! هریدن آل چیقارسه نه یاپارز ؟ آئی که دوشوندم .. هایدی داوود پاشا مکتبه قوش . هله الحمدالله . اورادم قید قاپانماش . ذاتا چوجوق مکتبک مالی . مدیر افندی بویله سسویله یور . شو وارکه قید چوق آچیق طوراماز . صیقشیلیرسه نهاری بر تقسیط ، بر لیرا تسویه اولونور . شاید استانبول سلطانیسنه یول بولونورسه بولیرا فدا ایدیلیر . مناسب ملاحظه .

داغ ۸

هایدی اوغلم ، سن ینه اسکی مکتبه که اسکیمی کبی دوام ایده طور ! کتیر دفترلرکی ، درس لرکی کورهیم .. ها ، مذاکره فلان دییه ، اویالامق ایچون یازدیریلان او صاحبه شیلری کچلم . نه یاپایم ، بابا ؟ یازدیریورلر . پکی پکی . بونه ؟ بو اخلاق درسی . نوت طوتا جغز .. معلمک کندی اثری .. بونی بوسنه تعطیل ائشانسندم تألیف ایتمش .. اویله دیورلر . اکر معارف باشقه کتاب ویرمزه بونی باصدیراجق . او وقته قادار یازاجغز . ناصیل شی ایتمش ، او ؟

(فصل ثانی) .. بونه ؟ فصل ثانی نه دیمک ؟ فصل اولی سوکره یازاجغز ..
اونی شمدی آکلایه مازمشنز .. بویله سویله یورلر . بوکا (فصل اول) دیسه
نه اولور ؟ حکمتندن سورولماز که .

اوبر درس لر ، دفتر لر ؟ اونلری کچلم . قاضی که دیدیک ، قضیه معلوم .
هیبسی کچن سنه کی کبی .. مثلاً عربی معلمی ینه (المشذب) دن ، (المقتضب) دن ،
(لسان العرب) دن ، داها بیلمم نه لر دن ایکی اوج یوز صحیفه یازدیر اچق . آه ،
شو معلم دنیلن ملاحظه سز مخلوق آله کچسه ده ، دفترینی آلدن آلاق یازدیر دینی
شیلری کندیسندن سورسهم !. آه ، آه ، ...

راغ ۹

هایدی مکتبه برده بن اوغرایه یم .. اوغرایورم . مدیر افندی ایله کورو-
شیورم ، مذاکره دییه یازدیریلان شیلری ، معلملرک نوتلرینی ، فصل اولسز
فصل ثانی بی حکایه ایدیورم . باخصوص اوراده کی (قوه حسیه) دن ،
(قوه فکریه دن) ، (قوه ارتیادیه) دن ، (روح) دن ، (علمک طله
حلولی قیلندن قلب و دماغه حلول ایدن عرض) دن ، (معقولاتی ادراک
ایدن جزو لایتجزا وشی لایتقسم) دن اوافق اوافق غمز لر ، چیتله تمه لر یاییورم .
بویوک امراللهک دارالفنون فلسفه درس لرندن آشیرمه ایدلش صاندیغ بو آغیر
بختلری اعدادی برنجی سنه یه کله جک چوجوق جغزلرک ناصیل آکلایا جقلرینی
سوریورم . مخاطبم قولاغمه اکیلوب یاواشجه ، نه یاپالم بو معلملری معارف
یوللایور ، دیور . بو سوز اوق کبی ایچمه ایشله یور .

سندله یه رک مکتبدن جیقیورم .. معارف ارکانندن بر بیلدیگک یانسه
اوغرایوب فاجعه بی حکایه ایدیورم . اوندن ده جوابی آلیورم .. هم ده قولاغمه
اکیلمه دن ، سنی یاواشلا تمه دن ، اوت معلم یوق ، تدریس ایچون کتاب یوق ،
مکتب بنالری اوپله ، هپسندن سوکره ده پارا یوق ، دیور . بو سوز اوق
اوسته خنجر اولیور . یوققونارق ، بوره کدن سیزان قانلری یوتوم یوتوم
یوققارق ، ایشمه کیدیورم .

(سوکی وار)

ایبارطلی صفی